

- राष्ट्रपति द्रौपदी मुर्मू न्यारी-न्यारी श्रेणियां मांय राष्ट्रीय फिल्म पुरस्कार दीना-अभिनेता अर फिल्मकार मोहनलाल ने दादा साहेब फाल्के पुरस्कार ऊँ नवाजी ज्या।
- रेलवे दीवाली अर छठ पूजा पर्व रे दौरान मुसाफिरां रा सुबीतां सारू बारह हज़ार खास रेलगाड़ियाँ चलावेला।
- मुख्यमंत्री भजनलाल शर्मा भीलवाड़ा मांय प्रदेश री पहली फ्लाईंग स्कूल रो उद्घाटन कीनो।
- राष्ट्रीय आयुर्वेद दिवस रे मौके आज देश-प्रदेश मांय कार्यक्रम राख्यी ज्या।

000

राष्ट्रपति द्रौपदी मुर्मू आज 71वां राष्ट्रीय फिल्म पुरस्कार समारोह मांय न्यारी-न्यारी श्रेणियां मांय बेहतरीन काम करण वालां ने पुरस्कार दीना। साल 2023 सारू फिल्मां बणावण, कहानियां सुणावण अर एक्टिंग करण मांय उत्कृष्टता रो मान करण सारू अ पुरस्कार दिया ज्या। नामी अभिनेता, निर्देशक अर निर्माता मोहनलाल ने सिनेमा रा हलका रो सब ऊँ ऊंचो मान, दादा साहेब फाल्के पुरस्कार दे र नवाजी ज्या। सर्वश्रेष्ठ फीचर फिल्म रो ईनाम हिंदी फिल्म 'ट्वेल्थ फेल ने, बेहतरीन एक्टर रो ईनाम शाहरुख खान ने फिल्म जवान सारू दियो ज्यो। अभिनेता विक्रान्त मैसी ने ई ट्वेल्थ फेल फिल्म सारू बेहतरीन एक्टर रा ईनाम ऊँ नवाजी ज्यो। सर्वश्रेष्ठ अभिनेत्री रो ईनाम अभिनेत्री रानी मुखर्जी ने फिल्म मैसेज चटर्जी वर्सेस नॉर्वे सारू दियो ज्यो।

000

प्रदेश मांय जीएसटी बचत उत्सव रा तैत न्यारा-न्यारा कार्याक्रमां रे मार्फत जनता ने जीएसटी री नुवी रेट रा बारा मांय जाणकारी दी जा रही है। पाली मांय आज वाणिज्य कर विभाग री ओर ऊँ कारोबारियां, वकीलां अर चार्टर्ड अकाउंटेंट्स सागे चर्चा करी ज्यी। सवाईमाधोपुर मांय केंद्रीय संचार ब्यूरो री ओर ऊँ कुश्तला रा महिला शिक्षक प्रशिक्षण महाविद्यालय मांय रैली, संगोष्ठी अर प्रदर्शनी रे मार्फत जाग जगायी ज्यी। करौली मांय गृह राज्य मंत्री जवाहर सिंह बेढम खबरनवीसां सागे बातचीत करता थकां वस्तु अर सेवा कर-जीएसटी रा फायदा बताया। वे कह्यो के इण ऊँ जीएसटी सिस्टम आसान बणेला अर इण मांय साफगोई आवेला।

000

केन्द्रीय गृह मंत्री अमित शाह स्टार्टअप्स ने नुवा भारत री रीढ़ बताया है। वे आज गुजरात रा गांधीनगर मांय दो दिन रा स्टार्टअप सम्मेलन रा उद्घाटन सत्र मांय बोल रह्या हा। श्री शाह कह्यो के लारला 10 साल मांय भारत रा स्टार्टअप तंत्र मांय जबरदस्त बढोतरी व्ही है अर ओ दुनिया रो तीजो मोटो स्टार्टअप तंत्र बण ग्यो है। देश रा नौजवानां माथे जोर देता थकां श्री शाह भरोसो जतायो के देश तीन साल मांय वैश्विक नवाचार सूचकांक मांय अगाड़ी दस देशां मांय शामिल व्हे जावेला।

000

ई सम्मेलन मांय एक हजार ऊँ बत्ता स्टार्टअप, पांच हजार नवप्रवर्तक अर एक सौ उद्योग सलाहकार भाग ले रह्या है।

000

दिवाली अर छठ पूजा रे दौरान मुसाफिरां रा सुबीता सारू 1 अक्टूबर ऊँ 15 नवम्बर बीचे बारह हज़ार खास रेलगाड़ियाँ चलाई जावेला। रेल मंत्री अश्विनी वैष्णव आज नई दिल्ली मांय खबरनवीसां ने आ जाणकारी दीनी।

000

मुख्यमंत्री भजनलाल शर्मा आज भीलवाड़ा री हमीरगढ़ हवाई पट्टी माथे प्रदेश री पहली फ्लाईंग स्कूल रो उदघाटन कीनी। ई मौके वे कह्यो आ फ्लाईंग स्कूल सुरू व्हे जावण ऊँ राजस्थान देश रा खुद रे पाण ऊबा व्हेवण रा संकल्प ने पूरो करण मांय योगदान देवेला। श्री शर्मा कह्यो के राइजिंग राजस्थान समिट रे दौरान आ फ्लाईंग स्कूल खोलण रो ऐलाण करी ज्यो हो, जठे पायलट सिखावण ले र देश ने सेवा देवेला।

000

मुख्यमंत्री आज भीलवाड़ा मांय न्यारी-न्यारी ठौड़ां लगायी ज्या सेवा शिविरां रो ई दौरा कीनी अर सरकार री न्यारी-न्यारी योजनावां रो फायदो लेवण वाळां सागे बातचीत कीनी। वे पात्र लोगां ने चैक अर मकान रा पट्टा ई दीना। ई मौके श्री शर्मा कह्यो के आं शिविरां मांय जनता ने सगळा जरूरी सुबीता एक ही ठौड़ मुहैया कराया जा रह्या है।

000

केन्द्रीय संस्कृति अर पर्यटन मंत्री गजेन्द्र सिंह शेखावत कह्यो है के आवता पांच साल मांय प्रदेश मांय नागरिक उड्डयन हलका ने और बधावो मिलेला अर जोधपुर मांय सैर-सपाटा री नुवी ठौड़ां विकसित करी जावेला। श्री शेखावत आज जोधपुर हवाई अड्डा माथे बणाया जा रह्या नुवा टर्मिनल भवन रा दौरा पाछे खबरनवीसां सागे बातचीत कर रह्या हा। वे बतायो के जोधपुर हवाई अड्डा माथे बणाया जा रह्या टर्मिनल रो काम आखिरी दौर मांय चाल रह्यो है अर इण रे अक्टूबर ताई पूरो व्हे जावण रा आसार है। श्री शेखावत बतायो के नुवा टर्मिनल ऊँ एके सागे 13 उड़ानां व्हे सकेला, जिण ऊँ शहर रो हवाई जहाज रे जरिये सम्पर्क और मजबूत व्हेला।

000

देशभर मांय आज 10वाँ राष्ट्रीय आयुर्वेद दिवस मणायी ज्यो। राष्ट्रीय स्तर रो जळसो गोवा रा अखिल भारतीय आयुर्वेद संस्थान मांय राख्यी ज्यो। केन्द्रीय आयुष अर स्वास्थ्य राज्यमंत्री प्रतापराव जाधव री मौजूदगी मांय आयुष मंत्रालय अर स्वास्थ्य अर परिवार कल्याण मंत्रालय री ओर ऊँ राख्यी ज्या ई कार्यक्रम मांय जनता अर धरती सारू आयुर्वेद री भूमिका रा बारा मांय जाणकारी दीरीजी। ई मौके कैसर री बीमारी रा ईलाज सारू एकीकृत ऑन्कोलॉजी इकाई रो उदघाटन करी ज्यो। प्रदेश मांय ई आयुर्वेद दिवस रे मौके धन्वंतरी पूजा सागे भांत-भांत रा कार्यक्रम राख्यी ज्या। राजधानी जयपुर मांय राष्ट्रीय आयुर्वेद संस्थान री ओर ऊँ जनता रा बेहतर स्वास्थ्य अर जागरूकता सारू जयपुर अर आरे-सारे रा गांवाई हलकां मांय मुफ्त शिविर लगायी ज्या अर आयुर्वेद जागरूकता रैली निकाळी ज्यी। एन.आई.ए. रा कुलपति प्रोफेसर संजीव शर्मा जनता ऊँ बेहतर स्वास्थ्य सारू आयुर्वेद काम लेवण री अपील कीनी।

000

राजस्थान पुलिस कांस्टेबल भर्ती परीक्षा 2025 री उत्तरकुंजी माथे आपत्ति दर्ज करावण री आखिरी तारीख बधा र 25 सितम्बर कर दीरीजी है। पैली आ तारीख आज ताई ही। पुलिस भर्ती अर पदोन्नति बोर्ड रा उप महानिरीक्षक मनोज कुमार आ जाणकारी दीनी। ध्यानजोग है के 13 अर 14 सितम्बर ने लीरीजी ई भर्ती परीक्षा रा पेपर री उत्तर कुंजी अपलोड कर दीरीजी है।

000

पशुपालन मंत्री जोराराम कुमावत आज जयपुर कने जोबनेर रा राजस्थान पशु चिकित्सा अर पशु विज्ञान विश्वविद्यालय री आधिकारिक वेबसाइट रो उदघाटन कीनी। ई मौके विश्वविद्यालय रा कुलगुरु, प्रोफेसर त्रिभुवन शर्मा समेत विश्वविद्यालय रा शैक्षिक अर गैर-शैक्षिक कर्मचारी मौजूद रह्या।

000

आकाशवाणी ऊँ हर महीना प्रसारित कर्‍यो जावण वाळो खास कार्यक्रम मन की बात 28 सितम्बर ने प्रसारित कर्‍यो जावेला। प्रधानमंत्री नरेन्द्र मोदी रा ई कार्यक्रम री आ 126वीं कड़ी व्हेला। ई सारू आप ई मुफ्त नम्बर 1800-11-7800 माथे 26 सितम्बर तांई राय दे सको हो। ई रे अलावा नरेन्द्र मोदी एप अर माय जीओवी ओपन फोरम रे जरिए ई विचार भेज्या जा सके है।

000

हनुमानगढ़ ज़िला री पीलीबंगा थाना पुलिस नशा विरोधी अभियान रा तैत पराली री आड़ मांय लुकाई ज्यी करीब दो करोड़ रुपया मोल री गैर—कानूनी अंग्रेजी शराब बरामद कीनी है। एस.पी. हरि शंकर आ जाणकारी दीनी। वे बतायो के अमृतसर—जामनगर एक्सप्रेस—वे माथे एक ट्रेलर री तलाशी रे दौरान भूसा रा कट्टां हेटे लुकाई ज्यी 943 पेटियां मांय ग्यारह हजार ऊँ बत्ती बोतलां बरामद करी ज्यी। आ गैर—कानूनी शराब पंजाब ऊँ गुजरात ले जाई जा रही ही। पुलिस मौका ऊँ बाड़मेर ज़िला रा दो तस्करां ने गिरफ्तार कीना है अर वां ऊँ पूछताछ करी जा रही है।

000